

## Pɔl saba cir kaplāŋ Tesalonifa ye

### *Syaha fla*

<sup>1</sup> Ndoo Pɔl tesē Silaasyi ne, Timuti ne, wii kē too saba nwo yrūhū nɔ wāã ye kē, yii mpāy ye ma Tesaloni wo, ma seefar le wo Tuhufua Yāhā ne tesē wo Yīŋfua Yesu Crise ne. Wo syaha ma ye ye. Yāhā ke ke kayī wāã ye kē tesē ke yrīŋ ne.

### *Tesalonifa troho wātāhā tesē pe Yesu wāta wīl ne pe Yater*

<sup>2</sup> Wo syaha wāã Yāhā kē yalebye ye bye wīl na. Wo ma maha nii n pāã Yāhā ne, wo sē n faha ye wīl ne ye. Wo loo pye yalebye. <sup>3</sup> Ye Yesu ta ye Yater, ma nii woo laam wīl ya pye. Ye ntāŋ dye yii tāy, loo maha ye ta ye n nii tēŋ tē yii kē. Ye maha koho taha yaha Yesu na. Wo ma nii n pāã Yāhā ne, wo sē n faha koo kai- ngīl bye wīl ne ye. <sup>4</sup> Wo nna, waa u Yesu kāndeyārwei ne, wo cā ye ntāŋ dye Yāhā tāy ke n ye yāŋ yi, ma yee ye nii ke wām. <sup>5</sup> Too Yesu kapāyīl pāã ye fla na, wo sē le pāã ye ye wo yē kaplāŋ ya ne ye. Yāhā Yrā pye wo ne, koo kē fāŋga n nii wo kaplāŋ na. Wo ba le cā laha ma yee, le Yesu kapāyīl ma cīnde. Too pye ye ne ma naa wo troho tāhā kii syi, ma yee ye waha kayī loo yāã, ye le cā. <sup>6</sup> Ye wāfāy yāã gboho Yesu wīl na, ma sye ma le Yāhā kaplāŋ sya nuhu ne, nuhu tii syi Yāhā Yrā

Fānga te le nawee- laam wo. Tee loo nde pye ke syi, ye ye troho tãhã wo wãŋ syi dyaŋ tesẽ wo Yĩnfua Yesu ne. <sup>7</sup> Loo nde ta, Yesu kãndeyãrfa mpãy pe ma Maseduan kãntraha kui wo, tesẽ Yakayi kãntraha kui ne, poo mii bye ga waha yãŋ ye na. <sup>8</sup> Le Yesu wĩ gbe ye fla na, ma cããŋ n gaha Maseduan kãntraha kui bye wo, tesẽ Yakayi kãntraha kui ne. Loo ya sã ne ye, tee Yãhã ta ye Yater kii syi na, nawee- le luhu teebehe bye wo. Wii ge saha laa pãã taha le na nantãŋ ye. <sup>9</sup> Too ba ka ye fla na, ye n ba wo yigi yõ mii, nawee- bye loo pãã. Ye mpar wãn tii tee ba ta too ma yãhã, ye too nde bye miy yaha. Cĩnde Yãhã gii ke wãn bye tãhã, ye ye yĩntaha sroŋ koo ya ye, ma ke tẽn tẽn. Yagaa ye ke Dya wãdurbaŋ sẽn. Nawee- bye maha loo pãã. <sup>10</sup> Yesu woo kẽ u ma Yãhã Dya, Yãhã u ta u n yir gbã wo, ma dur ba yrãŋ na gbaafa ye. Woo kẽ, tuu wo sya yaha, Yãhã ma n ba wo sãhã wo kapee- wĩ na ye. Yagaa, ye woo wãdurbaŋ sẽn, yaliile tuu ga ba yir yãhãyiŋ na u dur ba kãntraha na.

## 2

### *Pɔl troho wãtãhã Tesalonifa fla na*

<sup>1</sup> Yii mpãy tee ma wo nna Yesu kãnde wo, yii ge le cã ma yee wo wãkaŋ ye fla na, ke sã yi wãwaha ye, mpãy Yãhã kapãyiĩ sya cĩnde. <sup>2</sup> Ye maha cã ma yee, too ba yir klo lii wo pe n yee Filipe ma cã pa ye fla na, pe ba wo tyehẽ ma wo nuhu ke fla na. Le sã -sã ba kai kua wo ye ye. Yãhã fãnga wãã wo kẽ, wo n pa maa le kapãyiĩ pãã ye ye. Nawee- busãã n yee poo ga sye wo na; loo naa

bye ne, wo waha naa n gaha le kapāyī wāpāā ne. <sup>3</sup> Kapāyī lii too n pāā nawee- ye, wo sē le wā klaha ta kawar wīī ye, wo sron le wāpāā ne ye ye, wo sē maha n ke wo nawee- plaha le kāmpee laa ter wo ye. Aye, kaplāṅ nkāy ke sron Yāhā ye, koo kē too n pāā. <sup>4</sup> Koo kē, ke wo yāṅ yi ma wo taha ke kapāyī wāpāā na nawee- bye ye. Wo sē n ke wo wīī n naa n tāy nawee- ye ye, wo n ke wo wīī le naa n tāy Yāhā ye, koo gii ke wo laam wūhū yāṅ. <sup>5</sup> Ye le cā laha ma yee, wo sē wo yē ta sīsī kawarfuafa dyaṅ ye, wo yē kapān laa sē le yar ma yee, wo koo ngī pye war wīī na ye. Yāhā yīnde ma wo na. <sup>6</sup> Wo sē myaha ke ye ye ye, wo sē maha myaha ke waa ter ye ye. <sup>7</sup> Too sya mii Yesu Crise tēnlēḥ, wo sē wii ta fāngafa ye laam wo ye. Aye, ye ntāṅ ba dye wo tāy, nahafua wāṅ syi dyaṅ tuu ne u pii gbihi n yigi. <sup>8</sup> Ye ntāṅ pe dye wo tāy, loo nde ta, wo n ba yer le Yāhā kapāyī wāyar wīī na ye ye. Loo ya sē ne ye, wo ba yer wāku wīī na ye kē. Ye wīī ba gboho ter wo laam wo, koo kē! <sup>9</sup> Yii mpāy ye ma Yesu kāndeyārfa, tēn lii too naa n tē, ma naa wāfāy gii fāy, ye le cā: Too pye ye ne ma naa le Yāhā kapāyī yar ye na, wo naa tēn tē ke yai ke yīmper. Wo sē naa ye fāy laa gē ne ye. <sup>10</sup> Yii mpāy tee Yesu ta ye Yater, too pye ye ne, wo troho wātāhā ter pye gbegbe ma maha ba sron, wāteepye sē maha pye le na ye. Ye bye le yāā yīnde ne, le maha pye Yāhā yīnde na. <sup>11</sup> Ye cā ma yee, wo pye yii nanem bye ne, mii tuhufua dyaṅ u pii ne. <sup>12</sup> Wo naa ye laam gbā, wo naa ye laam yīn ye kē, wo naa ye nar ye naa ye troho tāhā Yāhā yor wo, Yāhā koo kē

ke ye yee dye ke Yai wo, ma maha ye ta ye n ke nayõr yãã.

*Wãfãy sê waha Tesalonifa ta pe n le Yãhã kapãyĩ sye ye*

<sup>13</sup> Wo maha syaha wãã Yãhã kě yalebye laa ter ne, loo ne nde: Too le Yãhã kaplãŋ pãã ye ye, ye le luhu. Ye sê le sya mii naweetee yẽ kapãn ya dyaŋ ye, ye le sya ma cã Yãhã yẽ kapãn ne. Le -sê ma cĩnde, Yãhã yẽ kapãn ne. Loo kapãn nde tẽn tẽ ye laam wo, yii mpãy tee Yesu ta ye Yater. <sup>14</sup> Yesu kãndeyãrfa yawãrfa mpãy pe ma Yude kui wo, poofa mii, pe seefar le Yesu Crise ne. Pe wãfãy yãã gboho le Yãhã kapãyĩ wĩ na. Wo nna, ye yãŋ pe na, koo kě wãfãy gii ke ye dye yagaa, ye ke sya laanyĩn ne. Wãnuhu gii ye terfa pe ye nuhu yagaa, Yiiffee- naa pe Yude Yesu kãndeyãrfa nuhu koo syi. <sup>15</sup> Poo Yiiffee- ya kě, pe naa pe faale Yãhã kaplãŋ tõrfa boo, ma sya ba wo Yĩŋfua Yesu boo. Yagaa, pe maha mii pe wo kar teebehe bye wo. Pe wĩ sye Yãhã ye, pe ma nawee- bye napĩ-! <sup>16</sup> Koo kě, pe n nii n sye wo na fãnga ne ma yee, mpãy pe wee Yiiffee- ye, wo ma n le Yãhã kapãyĩ pãã pe ye pe n sya yaha ye. Pe yagaa kapee- nkãy pe n pye, ma le taha faale cãã wũhũ na, koo ngĩ bye n ta, Yãhã laam n war pe ne.

*Põl n traha u maha Tesalonifa yãã*

<sup>17</sup> Wo nna, wo cããŋ wii na, ma dey wii na, wo laam sê -sê faha ye na ye. Loo ne, le sê ma- ye, ye wãyãã laam n wo yigi fãnga ne. <sup>18</sup> Wo naa n traha wo dur ga ye fla na. Tehe syãŋ bye, ndoo Põl yee, n ga ka ye fla na, Setane sãndãpee yĩŋfua

n yer tã wo na. <sup>19</sup> Wo Yĩnfua Yesu ma'a dur ba per gii, ye wĩ sē na, le ga ba nii nuhu wĩ wo ye, le ba wo myaha gboho wo Yĩnfua Yesu ye. Āwã, wo koho taha yaha yii poo na, wo myaha n waha ba gboho Yesu ye. <sup>20</sup> Yii me tee ga ba ta wo n cã wo yee, wo yia wo naa nuhu di.

### 3

<sup>1</sup> Ye wãyãã wĩ le gboho ter wo laam wo, wo n gblihi laa ma kuee wii ya klo nde wo pe n yee Aten, <sup>2</sup> ma wo nampyen Timuti no wãã u ga ye yãŋ. Timuti tēn tē wo ne Yãhã kē, le Yãhã Yĩndefua Crise kapãyĩ wāyar ne nawee- na. Tee mii Yesu kãndeyãrfa, wo u lehe wãã ye ye, u ga ye ta ye n fãnga yãã ye naa le Yesu kãnde yãr, tuu maha ye ta ye n naa n gaha yahasee ye le wo nuhu ne. <sup>3</sup> Loo na, pe napĩ- pe wo bye fã y wãfã y gii ne, koo wãfã y nge ma n waha yia ke ye laam wlãhã ye. Yii ge le cã ma yee, koo wãfã y nge saha ke laa wii Yesu kãndeyãrfa yĩŋ na ye. Yãhã kē ke loo ta. <sup>4</sup> Ye cã, too pye ye fla na nantãŋ, wo ba ye cãã yar yaha ma yee, pe napĩ- ga ba naa wo bye fã y. Loo le n pye yagaa wo bye na, ye n nii le yãã. <sup>5</sup> Loo ne, ye wãyãã wĩ le gboho ter ta laam wo, ta n gblihi laa ma Timuti lehe wãã ye ye u ga ye yãŋ, ye ma ye n pye mii le Yesu kãnde wãyar ne. N ba fya ma yee, laa na sãndãpee yĩnfua ga pye u ye tyĩn yi kãã le Yesu kãnde wo, wo tēn bye n nii tēwai ye fla na.

#### *Pɔl laam yĩn Tesalonifa ne*

<sup>6</sup> Yagaa, Timuti tuu ka maa ye yãŋ, ma dur ba wo ye, u kayũhũ pãã wo ye, ye troho wãtãhã wĩ

na le Yesu kãnde wo, tesẽ ye ntãŋ wãdye wĩĩ ne yii tãŋ. U wo pye ma yee, wo wĩĩ ma le tãŋ nii ye laam wo. U maha yee ye wãŷãã laam ke wo yigi mii, wo wãŷãã laam bya ye yigi ke syi dyaŋ. <sup>7</sup> Wo nna, kapee- nkãŷ ke wo dye, ma suhu wãfãŷ gii ne ke ma wo na, too -sẽ Timuti kaplãŋ ngĩĩ luhu ye wãŷãr wĩĩ na le Yesu kãnde wo, loo nde wo laam yĩn. <sup>8</sup> Yagaa, too cã ye yii plãhã ma kuee le Yesu kãnde wo, loo nde wo kadye sãhã wo kẽ, ma maha fãŋga gaa taha wo na. <sup>9</sup> Yãhã wĩĩ gboho wo laam wo, ke maha ta ye wĩĩ n nii wo ye nuhu wĩĩ ma sya ga ta ter. Wo syaha kloŋ ter Yãhã na loo nde ne. <sup>10</sup> Ke yai ke yĩmper, wo ke nar wo laam bye ne, ke le sya wo ye, wo n waha ka wo ga ye yãã yĩnde ne. Laa ma pye, le ye wlãhã ye Yesu kãnde wãŷãr wĩĩ ne, wo n ga le gbihi ye kẽ. <sup>11</sup> Wo Tuhufua Yãhã koo ge tesẽ wo Yĩŋfua Yesu ne, pe le sya pe kãnde gbihi ta, wo n waha ka wo ga ye yãã! <sup>12</sup> Wo Yĩŋfua u ta kaa n naa n taha ye ntãŋ wãdyeŋ na yii tãŋ tesẽ nawee- bye ntãŋ wãdyeŋ ne ye tãŋ, le n sya ba nii mii ye ntãŋ pe dye gboho wo tãŋ mii. <sup>13</sup> Tee wo Yĩŋfua ta ye Yater, u ta u wĩĩ n nii gbãã kuee ye laam wo, laa wãpee ma n pye ye laam wo ye. Loo na, wo Yĩŋfua Yesu ma ba dur ba mpãŷ bye ne pe ma u kur ye, ye laam bye ga ba nii gbegbe wo Tuhufua Yãhã yahasee ye. Ngaa ma n waha wo cer Yãhã na ye.

## 4

*Troho wãtãhã gii syi ter ke n tãŋ Yãhã ye*

<sup>1</sup> Wo nna, yagaa too ye klaha ye yai ye naa ye troho tãhã mii le n waha naa n tãy Yãhã ye, wo cã loo ne tee n pye. Yagaa, waa ye nar waha wĩ nen nde ne wo Yĩnfua Yesu myaha na: Tee ye troho tãhã mii, -ye kaa gbihi taha naa n gaha ke wãtãhã na! <sup>2</sup> Kai- nkãy wo Yĩnfua Yesu yee tee yai ye naa n pye, wo ke yar ye na. Ye ke cã.

<sup>3</sup> Lii le ma Yãhã laam wĩ loo ne nde: -Ye ye troho wãtãhã ter ta, ke n naa n yõ, ke naa n nii gbegbe, -tee yii yigi tyatyãhã kuε ye. <sup>4</sup> Ye byε, -ye naa kacãn yãã ye ca kuε ye, -ye naa nagboho ta pe na. Lii le yõ Yãhã ye, -ye naa loo pye! <sup>5</sup> Ye ma syi ye flefle n gboho ter ye na mii nawee- mpãy dyaŋ pe sã cĩnde Yãhã cã ye. <sup>6</sup> Waa ma syi u kapee pye u nampyeŋ na loo nde ne ye! Waa ma syi u dugu u nampyeŋ na kai laa wo ye. Wo ye yar waha wa loo nde ne ma yee, mpãy pe koo kapee- ngĩ ter pye, Yĩnfua ga ba pe pẽn. <sup>7</sup> Ye sã yãã, Yãhã sã wo yee ma yee, wo naa wo troho tãhã tyatyãhã yor wo ye, ke wo yee ma yee, wo wo troho wãtãhã ter ta ke n naa laha kãnkai- byε wo. Loo le n tãy Yãhã ye. <sup>8</sup> Loo ne, wii ma loo kaklaha wĩ nen nde sye, naweete kaklaha sã kã tuu sye ye, Yãhã kaklaha kã tuu sye, Yãhã gii ke ke Yrã le ye laam wo.

<sup>9</sup> Tee mii Yesu kãndeyãrfa, ye ntãŋ wãdye wĩ na yii tãy, laa kafuẽ wee tã ga maha yrũhũ yar ye na ye. Yãhã gε ye yar wa, tee ga pye mii, ye wĩ naa n tãy yii ye, ye le cã. <sup>10</sup> Loo gε ne tee n pye ye Yesu kãndeyãrwai mpãy byε ne pe ma Maseduan kãntraha kui kur byε wo. Wo nna, wo maha le nar ye ye, -ye maha kaa taha loo nde wãpyeŋ na.

11 -Ye naa n ke ye naa ye troho tãhã laanyĩn ne, ye sã yai ye nii teger waa ye ye, ye yai ye naa ye yĩn kai- gbihi yii ya. -Ye naa tẽn tẽ yii ya ye naa ye yẽ digi ke, mii too ba ye yar wa le ne mii. <sup>12</sup> Ye ma nii koo pye, waa saa naa n fãye ye yẽ wãwoo wĩ ne ye, tesẽ mpãy pe wee Yesu kãndeyãrfa ye, pe ma n laa yãã ye na ye.

### *Yesu ga dur ba kãntraha na mii*

<sup>13</sup> Wo nna, mpãy pe ku ter wa, lii le ga ba pe dye, wo n traha ye cĩnde cã loo nde na. Loo na, ye laam saa wlãhã naa n nii yalebye mii mpãy dyañ, pe sã koho taha yaha cĩnde yrã na ye, cĩnde yrã lii wãkuayãã wee le na ye. <sup>14</sup> Wo cã ma yee, Yesu ku ma dur, ma yir gbã wo, ma pa yrãñ na gbaafa ye. Loo ta wo n maha cã ma yee, mpãy pe Yesu ta pe Yater ma sya ba ku, Yãhã ga ba poo bye ta pe n yir gbã wo, pe dur ba yrãñ na, pe ba nii Yesu ne. <sup>15</sup> Wo Yĩnfua wo yar kai- nkãy ne, waa ke pãã ye ye: Yĩnfua ma ba dur n pai, wii mpãy too sã ku wa ye, wo saa ba pye mpãy yahasee ye pe ku ter wa ye. <sup>16</sup> Wo ga ba luhu tẽn gaa ne mii waa dyañ tuu gbey fãnga ne. Wo ga ba luhu yãhãyiñ tẽnlehe yĩnfua waa yĩmbui ne. Wo ga ba luhu Yãhã tũũtũũ wãwuu ne. Yĩnfua ge ga ba yir yãhãyiñ na u tege ba. Mpãy pe ba Yesu ta pe Yater ma sya ba ku, poofa ga ba yir wa gbã wo, pe dur ba yrãñ na, pe yahasee sya. <sup>17</sup> Loo kur ye, wii mpãy too ga ba pye nantãñ yrãñ na le yale wo, wo bya waa ba yir taha pe na yãhãsyõr wo, wo ga Yĩnfua wãã ncaha ye. Loo na, wo ga ba kuee yai tãñ Yĩnfua ne. <sup>18</sup> Tee mii ye kaplãñ



ngĩ luhu, -ye naa ke pãã yii ye, ye naa ye laam  
yĩn loo nde ne!

## 5

*-Ye yii yigi, Yĩnfua wãdurbaŋ ga ba ye fe gbe!*

<sup>1</sup> Wo nna, kai- ngĩ pyeyale tesẽ ke pyeper ne, ye sã n kε n koo yrũhũ yar ye na ye. <sup>2</sup> Yii γε le cã laha ma yee, waa saa ba Yĩnfua durbaper cã ye. Koo per ga ba pye mii yuhu wãŋ syi dyaŋ tuu ne pa yĩmper wo, waa γε saa cã ye. <sup>3</sup> Yaliile nawee- ga ba naa n yee: Yagaa woo, laa wãpee wee ye, ntãncer wĩ laa wee nantãŋ ye, loo yale -sẽ ne, le kapeengbãŋ ga pe fe gbe le pe dye. Pe saa ba wloho yi le wo ye, le ga ba nii mii calaifua wãŋ syi dyaŋ, laha ke ne u fe gbe wãyaa ne. <sup>4</sup> Yii poo na, wo nna, tee laa cã Yãhã wĩ na, ke per saa waha ye fe gbe yuhu wãŋ syi dyaŋ ye. <sup>5</sup> Ye sã yãã, ye byε ye ma cãã- nawee-, ye ma yai nawee-, kai nkãŋ ke yõ gbaa na, ye koo pye. Wii mpãy too Yesu ta wo Yater, yĩmper wohofa sã me wo ne ye, wamfa sã me wo ne ye. <sup>6</sup> Loo na, wo ma syi wo naa napar pye wo sã wãŋ naa n faha wo Yĩnfua Yesu wĩ ne mii mpãy dyaŋ pe sã cĩnde Yãhã cã ye. Wo yai wo naa wo laam too yalebyε wo Yĩnfua Yesu wĩ ne, wo yai wo naa kacãn yãã wii na. <sup>7</sup> Yĩmper kẽ nawee- pe sã n wãŋ, yĩmper maha kẽ nawee- pe sãm wo n ter, ma n faha pe ya yaha. <sup>8</sup> Wii na, wo ma yai nawee-, wo yai wo naa kacãn yãã wii na. Wo ma Yesu ta wo Yater ma maha ta, wo ntãŋ nii n dye wii tãŋ, le ga nii wo ye mii ntẽn nayroho dyaŋ naan miyfa pe le paha tã kadye na. Wo ma wo koho taha yaha

wo wāsyayaha wĩ na, le ga nii wo ye mii ntēn yīncigi dyaŋ naan miyfa pe le paha tã yīŋ na. <sup>9</sup> Ye sē yāã, Yāhã sē wo yāŋ yi ma yee, ke kasāhã te ba too wo na ye. Ke wo yāŋ yi, ma yee wo wāsyayaha yāã wo Yīŋfua Yesu Crise kāmāy na. <sup>10</sup> U Syayahafua ku wo wĩ na, ma yee wo ba nii u ne yaliile wo u ma ba dur ba. U dur ba wo yāã yrāŋ woo, u dur ba wo yāã too ku woo, loo wĩ nen ya ne, wo ga ba nii u ne. <sup>11</sup> Loo na, -ye naa ye laam gbã, -tee naa koho le yii ye, ye naa kaa taha ye troho wātāhã na Yesu Crise kānde wo!

### *Ke kai- wāyar kuasaha*

<sup>12</sup> Mpāy pe Yīŋfua tēn tē ye kē, ma ye troho wātāhã sron ye kē Yesu kānde wo, ma ye yi n kãã kapee- wāpyeŋ kānde wo, wo nna, wo ye nar, -ye naa nagboho ta pe na! <sup>13</sup> Pe tēn lii tē ye kē, ye tyii loo nde n ta, pe wĩ n naa n tãy ye ye. - Ye naa laanyīn wūhū pye yii kē tesē ye nampyeŋ-bye ne! <sup>14</sup> Wo nna, wo ye bye nar, mpāy pe tēn wĩ sye, -ye pe yar le ne ye yee, kayĩ sē ne pe dye yer ye. Mpāy pe ma, laa le pe fāy, -ye naa pe laam yīn! Mpāy laam pe ma fāhãfāhã kapee- wāpyeŋ kue ye, -ye naa pe yāŋ ye naa laantor kaplāŋ le pe laam wo. -Ye naa ye laam yīn poo mii bye ne! <sup>15</sup> -Ye naa yii yigi: Ye nampyeŋ- ma kapee pye ye na, ye ma syi ye le dur u kē ye! -Ye naa kayĩ loo ke, ye naa n pye yii kē tesē nawee- bye ne. <sup>16</sup> -Ye yāŋ, -ye naa nuhu di yalebya, <sup>17</sup> -tee naa n pāã Yāhã ne yalebya, <sup>18</sup> -tee naa syaha wāã Yāhã kē kānkai- kur bye wo! -Ye naa ye troho tãhã koo syi Yesu Crise kānde wo, yii mpāy tee seefar le Yesu Crise ne. Koo ke ma Yāhã laam wūhū.

19 Yāhā Yrā lii Yāhā le le ye laam wo, le ma mii naa dyaŋ Yāhā ke tar ye laam wo. -Ye naa n luhu le yĩmbui nde ye, ke naa ma n fege ye! 20 Wii ma Yāhā kapān laa luhu u laam wo ma le tōr; ye ma syi ye yee, yīŋ wee le na ye. 21 -Ye yāŋ naa n le kai- bye wo, lii ma sroŋ, -ye loo gbe! 22 Lii le -sē pee, -ye loo yāã ye le ta yaha!

*Syaha tesē Yāhā wānar fla ne*

23 Yāhā gii ke n pai yrīŋ ne, ke ta ye n kuee yai tāŋ ke koho wo. Ke ye laam bye ta pe n kuee yai tāŋ gbegbe, ye yrā ne, ye kadye bya ne, wo Yīŋfua Yesu Crise n sya ba dur ba! 24 Yāhā koo ke ga le pye ye kē. Ye sē yāã, Yāhā sē n yi ke kapān kur ye ye. 25 Wo nna, ye bya, -tee naa Yāhā nar wo kē yii ndoŋ! 26 Yesu kāndeyārfa mpāy bye pe ma ye fla na, ye pe bye gbihi syar wo kē, ye pe yar wo bye ma tuhufua nen pii, wo ntāŋ dye wii tāy. 27 N ye nar Yīŋfua myaha ne, -ye saba nwo kal Yesu kāndeyārfa bye n luhu. 28 Wo Yīŋfua Yesu Crise u kaa taha ye na.

**YĀHĀ NAAMBIYĀRFĀN SABA**  
**Karaboro, Eastern: YĀHĀ NAAMBIYĀRFĀN SABA**  
**New Testament**

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

---

PDF generated using Haiola and XeLaTeX on 22 Feb 2024 from source  
files dated 29 Jan 2022

15120496-00e2-503a-8d40-2d7cfdc1ba5b